

帝
京
景
物
略

敘

燕不可無書而難爲

書

本朝之制敦尚節儉

非有漢唐宮室之廣
麗別館離苑跨山彌
谷以數百千計也非
有原廟之幸汾陰之

祠閣道周流長途中
宿若九成華清之避
暑也非有長楊較獵
周陸禽獸昆明曲江

之水嬉也地可墾土闢
九達之外以瞻農萃
昨隸其可覽觀則擊
壤之叟祝釐之倫相

與夷嶮而堙谷列植
招提靈固仙臺遠近
落離于是都人士遊
焉觴焉咏焉曰燕難

爲書燕不可無書也
陳留之志風俗也襄
陽之志耆舊也會稽
之志典錄也岳陽之

志風土也。雒中之志
伽藍也。華陽之志人
物也。志焉爾。余門人
劉生侗之志燕異是

其言文其旨隱其取
類廣以僻其篇幅無
苟畔其刻畫也景若
里之新豐雞犬可識

也物若偃師之偶歌
舞調笑人可與娛可
與怒也粵古作者未
有是矣爰有于子奕

正采厥事周子損采
厥詩以佐劉生之筆
率墨潘蓋周諮于燕
者五年著于秣陵者

經年而成書曰

帝京景物畧劉生以質

于余而後乃行之余

得讀是書甚詳矣畧

言之者何以余所聞
于燕醫無間之山昭
余祈之藪崆峒之上
廣成子之石室存焉

西山之大小翮王次
仲之所落其翼也息
壤之涌金馬門張世
傑之生范陽村謝枋

得之餓憫忠奇與曾
所不至斯不及焉曰
畧也諒哉

賜進士第中憲大夫

協理詹事府事少詹
事兼翰林院侍讀學
士管理纂修

玉牒

事務前南京國子監

祭酒直

起居注纂修

兩朝實錄知

制誥

經筵日講官方選年

撰

叙

都應垣也。燕之應極垣有三焉。極一而已矣。山東出驪十有二。極北居指十有二。以柄天下之懸杓。天險設於坎。地勢厚於坤。皇建而人民會歸於極。有進矣。

帝北宅南嚮。威夷福夏。玉食航焉。蓋用西北之勁。制東南之饒。亦用東南之饒。制西北之勁。饒勁各馭。勢長在我。若欲饒其所勁。勁其所饒。則不識。

先皇之遠算矣。又進矣。燕雲割而中華蹙。嶺可界也。
界之。河可界也。界之。江可界也。界之。豈無遠猷。川
遠阻修。科墮從杖。弓撓於蘇爾。中宅天下。不若虎
眈天下。虎眈天下。不若挈天下爲旌。而身抵其几。
維不如關。關不如薊。守維以天下。守關以關。守天
下必以薊。

文皇帝得天子自守邊之畧。於厥初封
都燕。

後燕。前萬世未破斯荒。後萬世無窮斯利。極勤之德。
素篋四海。豈偶哉。三百年來。率土臣民。罔不輻輳。
紅塵白日。無有閒人。目指所及。風高沙飛。土附水
竈。幽巖勝蹟。非所經心。輒有小警。而懷都意輕矣。
夫都燕。天人所合。發也。陰陽異特。瞻顧維宅。吾知
之以天。流泉臨原。士烝民止。吾知之以人。此

帝京景物畧。所爲著也。攷中原之山勢。江北主。江南
賓。古聖先王篤生。必於江北。江北之山。歸結泗鳳。

帝從山後。其區莫過之。本同末異者。山也。本異末
同者。水也。天下之水。東趨滄海。滄海所涯。號稱天
涯。故山水之攸結。莫并我

帝者也。於焉神人萃物。爽馮成周鼓文。漢代瑞像。
脰翼謂何。氣先符應。他若潭雲塔影。龍螺洞光。木
石幻氣。精熙游盛。今古雖留。更僕未可。悉數已。何
北學而燕游者。五年。何之友于奕正。燕人也。二十
年。燕山水間。各不敢私所見聞。彰厥高深。用告同

軌奕正職蒐討。侗職摘辭事有不典不經。侗不敢
筆辭有不達。奕正未嘗輒許也。所未經過者。分往
而必實之。出門各帶歸。相報也。所采古今詩歌以
雅以南以頌。舍是無取焉。侗之友周損。職之三人
揮汗屬艸。研冰而成書。其卷八。其目百三十有奇。
崇禎八年乙亥冬至後二日麻城劉侗撰

畧例

宛平于奕正述

至尊山苑。非外臣見聞傳聞。所得梗槩。四壇。

諸陵。臣庶瞻望焉。罔敢至止。今畧所記。帝京景

物。厥惟游趾攸經。坐譚攸析者。蒼莽朝曛。攸至也。

近百里而瞻言之。豐碑孤塚。攸存也。遠千年而馮

吊之。粵有僻利荒荒。家園瑣瑣。游莫至。至莫傳矣。

畧之。○長安。都秦稱也。都燕。非所稱也。戰國曰燕。

金曰燕京。元曰大都。我明而襲古稱。奚可哉。我
明日順天。迄八府而一稱之。曰北京。對南京而二
稱之。今約畧古甸服內也。稱曰帝京。○紀載有
體爾。艸則有疏。射則有策。今帝京名篇。而所記
山水園林。判字也。若指畫經濟。娓娓不休。謂其言
有倫。春乎。編中如大學之典則。首善書院之講學。
三忠祠之運漕。盧溝橋之河道。稽山館之沿革。偶
譚及之。用志欣慨。卷不盡不詳焉。○翼順天府志

而傳者燕史。戚伯堅宛署雜記。沈榜長安客話。蔣仲舒長安可游記。朱啟明等。或雜失倫。或訛或漏。或漫。或俚。茲編人徵其始末。事核其有無。博採約修。一新舊觀。○疑乃傳疑。信乃傳信。必也。成書有據。碑版今存。雖故老稱說。尚憖置焉。况乎東野齊諸取爲竹郵哉。然而多僻多異。其鍾孕洋溢弘遠矣。○地從石晉割後。不隸中土。六百餘年。而遼金元。遍都之。故青蹟異聞。事多二史編中。爲表舊事。

不盡刪削。退夷進夏。深用懽然。○山之名。水之名。寺院家園之名。書土人所習呼。使游者詢問也。城九門有 賜名。而土人或仍舊呼。則非 王制。今悉遵門額。不曰海岱順城。惟述金元時語。則仍其稱。○西山巨剎。剎者半中璫。金碧鱗鱗。區過六百。編所列梵宮。間存創者姓氏。志濫也。安公一祠。學聖尊儒。大書特書之。○書紀 帝京 廟號 祖諱森然。雜列。故先輩鉅公。或稱名而冠以官。或稱

名而冠以籍。僧道隱逸名不可稽也。俗稱之。○昔
稱古人碑碣。山川眉目。茲地漢唐宋碑存者一二。
餘所駢列。遼金元物也。文字荒蕪。僅志歲月。但存
碑目。不錄原文。存一元碑。夷語可矧故。○是編著
作。在敘記間。篇有幅。幅有其首尾。或體致弗合。則
亦捨棄舊聞。如報國寺。連遊所屬目。以成其篇。而
他碑記。卽不可闕入。按記。英宗 周后弟吉祥。
幼視髮。晝遊市陌。夜宿報國寺伽藍殿中。英宗

忽夜夢伽藍神來告。

后弟今在某所。

后夢亦

同。卽日求得之。然吉祥願爲僧。不可強。迺改觀。

寺曰大慈仁寺。今西之伽藍殿夢所告處也。○編

所主者地也。如漢前將軍王泉解池。著異。其地

述止北征一事。事在燕市也。他若文田。無謂之助。

戰忠肅武林之兆。夢事不在燕。一無旁及。○問里

習俗。風氣關之。語俚事瑣。必備必詳。蓋今昔殊異。

日漸淳澆。采風者深思焉。春塲附以歲時。弘仁橋

附以醢香。高粱橋附以熙遊。胡家村附以蠶嬉。○
名公游紀。爲光山澤。要其命筆。則一日偶然之玄
對。歲月先後。致人人殊。雖甚鴻篇。不仍不載。○關
廟狄祠等。不錄本傳。以國史炳然。無煩具述。他惟
事隱軼。論淆訛者。務表章而辯白之。○園林寺院。
有名稱著而駢列以地。如淨業寺蓮花庵之附水
關。李園米園之附海淀者。有名解隱而特標著之。
如水關之太師園。卧佛之水盡頭者。有昔著今廢。

猶爲指稱焉。如高粱橋之極樂寺。玉泉山之功德寺者。○梵宇。亟稱十刹海也。園館。亟稱太師園也。山林藪澤。亟稱滴水巖雲水洞也。人工崇飾。非所貴。○奕正。燕人也。好遊而遊。詳于燕。劉子楚客也。好遊而燕中遊者五年。是編。奕正撫事。疑者罔濫。信者罔遺。劉子屬辭。怪匪撰空。夸匪濫實。○成斯編也。良苦。景一未詳。裏糧宿春。事一未詳。發篋細括。語一未詳。逢襟捉問。字一未詳。動色執爭。歷春。

徂冬。銖銖緬緬而帙成。○山川記止夷陵剏宇記。
止衰盛。令節記止簪游。園林記止木石。此事屬辭。
不置一褒。不置一譏。習其讀者。不必其知之。言外
得之。○志山水古歟。得水經注焉。志楚剏古歟。得
維陽伽藍記焉。志熙游古歟。得武林舊事焉。楊周
懷音騁道。其苦也易工。酈子輪周方域。其博也易
奧。是編盛明拜手之屬言。畿郊千里之觀聽也。
枯苑致異。廣狹量殊。難矣難矣。且其布體散辭。不

更躡向人一步。○周二京。漢兩都。非其盛也。我朝兩京峙建。方初方盛。猗歟勝矣。帝京編成。適與劉子薄游白下。朝遊夕述。不揆固陋。將續著南京景物畧。已屬艸矣。博物吾友。尚其助予。景物而追昔游。徵後至。則附以詩。編所得詩五千有奇。本集十有七。碑刻十有一。鈔傳十有五。秘笈十有二。奕正與劉子。未暇選定。以屬周子損。逸四千篇。存千篇有奇。其徵詩未至者。英之。○前記志者。陳

詩不備采詩無擇焉。天寧寺之在中州。朝天宮之
在金陵。秘魔巖之在五臺。文山祠之在江右。忠肅
祠之在武林。景異物殊。悉從刪汰。○詩因時以次。
例也有因地者。先海澱而李園。而米園。先甕山而
耶律墓。而圓靜寺。三忠祠。先祠而通惠河。報國寺。
先松而像而閣。各有類凡。取便閱者。○燕土著無
論已。流寓遠者數世。客久者數十年。讀斯編也。耳
目一驚。未也。吾耳及矣。趾未及。吾闕焉。趾及而事

聖疑。吾闕焉。若夫非吾闕之。而選勝選事。寡聞又多矣。以語周子。周子曰。未也。先輩之題其地也。匪不傳也。其集也。匪木不傳也。傳矣。而吾日周之。十有二耳。以語劉子。劉子曰。吾續之。吾續之。吾惡知後且續者之不信乎。茲乎。

帝京景物畧

一 總目

卷之一 城北內外

大學石鼓

文丞相祠

水關

定國公園

金剛寺

英國新園

三聖菴

崇國寺

古墨齋

龍華寺

十剎海

千佛寺

火神廟

英國家園

大隆福寺

滿井

卷之二

城東內外

于少保祠

吏部蔭花

泡子河

觀象臺

成國公園

丹駟馬園

燈市

曲水園

東嶽廟

春場

三忠祠

廟文通墳

徐中山將臺

黃金臺

卷之三

城南內外

關王廟

藥王廟

金魚池

迦因寺

李皇親新園

法藏寺

隆安寺

報國寺

長椿寺

憫忠寺

草橋

胡家村

韋公寺

弘仁橋

南海子

聚燕臺

白雲觀

觀音寺

天寧寺

盧溝橋

卷之四

西城內

首善書院

天主堂

石燈菴

二

李文正公祠

雙塔寺

城隍廟市

鷲峯寺

靈濟宮

顯靈宮

萬松老人塔

龍山館店像

帝王廟

白塔寺

朝天宮

卷之五

西城外

高梁橋

極樂寺

白石莊

惠安伯園

真覺寺

萬壽寺

雙林寺

大佛寺

利瑪竇

慈慧寺

摩訶庵

釣魚臺

皇姑寺

慈壽寺

海淀

黑龍潭

溫泉

法雲寺

卷之六 西山上

香山寺

碧雲寺

洪光寺

卧佛寺

水盦頭

中峰菴

晏公祠

盧師山

平坡寺

嘉禧寺

罕山

石景山

卷之七

西山下

西堤

功德寺

玉泉山

甕山

戒壇

潭柘寺

雀兒菴

仰山

滴水巖

百花陀

卷之八

畿輔名蹟

秋梁公祠

劉司戶祠

九龍池

响响崖

銀山

駐蹕山

上方山

雲水洞

石經山

紅螺嶼

賈島墓

樵桑村

督亢陂

酈亭

張華宅

彭小仙墓

燃燈佛塔

李卓吾墓

盤山

工像寺

湯泉

延祥觀

沙巖寺塔

種玉田

紅螺山

帝京景物畧

卷之一

城北內外

太學石鼓

文丞相祠

水關

定國公園

金剛寺

英國公新園

三聖菴

崇國寺

古墨齋

龍華寺

十刹海

千佛寺

火神廟

英國公家園

大隆福寺

以上城內

滿井

以上城外

帝京景物畧 卷之一

遂安方逢年——定

麻城劉 侗

修

宛平于奕正

大學石鼓

都城東北艮隅，瞻其坊曰崇教，步其街曰成賢，國子監在焉。國初本北平府學，永樂二年改國子監，左廟右學，規制大備。彝倫堂之松，元許衡手植也。廟門之石鼓，周宣王獵碣也。維我太祖高皇

帝先教學。致重儒均。爲萬世化本。稽古虞商在邐。
夏周在國之制。建太學南都之鷄鳴山。去朝市十。
里。我成祖文皇帝。建北太學。雖沿元址。其去朝。
市如之。不越都閭。而朝集市紛遠矣。而巽巽降雍。
之士。敬業遜志矣。廟初設像。嘉靖九年。撤像以主。
焉。啟聖有專詞焉。庶從祀有陟有黜焉。從大學士。
張孚敬等議也。凡我列聖踐祚。必躬行釋菜禮。
皮弁執圭。再拜而獻帛爵。畢仍再拜。臨彛倫堂。

賜祭酒司業等坐講。賜敕戒諭焉。夫我朝之初興教國子升坐背誦課試黜陟假假之嚴古莫比也。燕賜之恩衣廩之給服器庖汎之需役其重其詳古莫比也。仕號坐班積分及格歷歲月教成授官內臺諫外藩臬古莫比也。勳戚重臣教習必繇太學四拜而謁師儒跪而聽問古莫比也。其所得士德功節學不之勝書每禮闈啓試國子生居十有七古莫比也。其聲教訖四海之外琉球交趾

囉囉烏撒等遣子入學。有舉制科歸其國者。古莫
比也。蓋是時。儒雅之秩。博助正錄。無不參不座之
晨。官民軍功。恩生。退省號房。無不燈不誦之夜。率
性堂。積分簿。無不歲不紀之資。薰濡器識。論樂鼓
鐘。文士備武。武士備文。故載道所。典籍庫之板本
無塵。明道堂之席恒煥。射圃之鼓。日有聞焉。計便
傳聞。入監有納粟納馬。出監有減歷增歷。差撥不
敷。坐班數少。議增則銓壅。議減則歷虛。我皇上

首幸辟雍。尋頒孝經小學罷納粟例。修學積分
法。禁逃班越歷者。將太學六堂之士。會講復讞。背
書課業。月有期日。坐堂七百。積試八分。撒滓鏟瑣。
忠良輩出。祖宗得人之烈。今斯盛哉。廟門內之
石鼓也。其質石。其形鼓。其高二尺。廣徑一尺有奇。
其數十。其文籀。其辭誦天子之山。初潛陳倉野中。
唐鄭餘慶取置鳳翔之夫子廟。而三其一。皇祐四
年。向傳師得之民間。十數乃合。宋大觀二年。自京

北移汴梁初置辟雍後保和殿嵌金其宇陰錯錯然靖康二年金人輦至燕剔取其金置鼓王宣撫家復移大興府學元大德十一年虞集爲大都教授得之泥艸中始移國學大成門內左右列矣石鼓自秦漢無傳者郡邑志云貞觀中吏部侍郎蘇勉紀其事曰虞褚歐陽共稱古妙蓋顯聞于唐初自是表章代有已唐自虞褚歐陽外則有蘇勗李嗣真張懷瓘寶臬徐浩杜甫韋應物韓愈宋則有

薛尚功、楊文昂、歐陽修、梅詢、蘇軾、黃庭堅、張師正、
王順伯、王應麟、趙明誠、鄭樵、元則有易、熊朋來、
吾衍、潘廸、虞集、周伯溫而我朝楊修撰慎以爲
鼓發聞已先。晉王羲之、唐章懷太子嘗言之。言鼓
者表厥攸始也。言人人殊。謂周宣王之鼓。韓愈、張
懷瓘、竇泉也。謂文王之鼓。至宣王刻詩焉。韋應物
也。謂秦氏之文。宋鄭樵也。謂宣王而疑之。歐陽修
也。謂宣王而信之。趙明誠也。謂成王之鼓。程琳、董

適也。謂宇文周作者馬子卿也。鼓文今剝漫而可
計數其方要當六百五十七言。先所存無攷。在宋
治平中存字四百六十有五。元至元中存字三百
八十有六。楊慎乃曰。正德中存字僅三十餘。據今
搨本。則甲鼓字六十一。乙鼓字四十七。丙鼓字六
十五。丁鼓字四十七。戊鼓字一十二。己鼓字四十
一。庚鼓字八。壬鼓字三十八。癸鼓字六。共三百二
十五字存。惟辛鼓字無存者。嘉興李尚寶日華又

曰東坡有手鈞石鼓文篆籀全音釋備遠勝潘邠
等所錄世有傳者或曰勒石而鼓之何日前此矣
今衡陽縣合江亭石鼓書院有石鼓一焉其大覆
鐘其字禹篆其文禹禋祀文也蓋三代之銘制文
德于彝鼎武功于鉦鼓征伐之勳表于兵鉞田狩
以閱武也武王初集大統因伐獸陳天命策命諸
侯故武成之記事也以策岐陽之記獵也以鼓
唐韓愈石鼓歌○張生手持石鼓文勸我試作石

鼓歌少陵無人謫仙死才薄將能石鼓何周制
凌遲四海沸宣王奮起揮天戈大開明堂受朝
賀諸侯劍佩鳴相磨蒐于岐陽騁雄俊萬里禽
獸皆遮羅鐫功勒成告萬世鑿石作鼓陸嵯峨
從臣才藝咸第一簡選撰刻留山阿雨淋日炙
野火燒鬼物守護煩撝訶公從何處得紙本毫
髮盡備無差訛辭嚴義密讀難曉字體不類隸
與蝌年深豈免有缺割快劍斫斷生蛟鼉驚邪

鳳翥衆仙下，珊瑚碧樹交枝柯。金繩鐵索鎖紐
壯，古鼎躍水龍騰機。圖書編詩不收人，二雅福
迫無委蛇。孔子西行不到秦，蒨旆星宿遺羲娥。
嗟予好古生苦晚，對此涕淚雙滂沱。憶昔初蒙
博士徵，其年始改稱元和。故人從軍在右輔，爲
我量度掘臼科。濯冠沐浴告祭酒，如此至寶存
豈多。氈包席裹可立致，十鼓祇載數囊佗。薦諸
太廟比郊鼎，光價豈止百倍過。聖恩若許留大

學諸生講解得切磋。親經鴻都尚填咽。坐見舉
國來奔波。刻苦剔蘚露節角。安置妥帖。平不頗。
大厦深檐與蓋覆。經歷久違期無他。中朝大官
老于事。詎肯感激徒嬾嬰。牧童敲火牛礪角。誰
復著手爲摩娑。日銷月鏹就埋沒。六年西顧空
吟哦。羲之俗書趁姿媚。數紙尚可博白鵝。繼周
八代征戰罷。無人收拾理則那。方今太平日無
事。柄用儒術崇丘軻。安能以此上論列。願借辯

口如懸河、石鼓之歌止於此、於乎吾意其難此、
唐韋應物石鼓歌○周宣王太獵兮岐之陽、
表功兮煒煌煌、石如鼓形、敝止十、風雨無歸、
蘇、今人濡紙脫其文、既擊既埽、白黑兮忽闕、
滿卷不可識、驚潛動蟄走云云、飛喘委蛇相糾、
錯、乃是宣王之臣史籀作、一書遺此、天地間、精、
意長存世、漠漠秦家祖、龍還刻石、碣石之罘、李、
斯迹、世人法古猶好傳、持來比此、殊懸隔、

宋蘇軾後石鼓歌○冬十二月歲辛丑。我初從政
見魯叟。舊聞石鼓今見之。文字鬱律蛟蛇走。細
細初以指畫狀。欲讀嗟如鉗在口。韓公好古生
已遲。我今况又百年後。強尋偏傍推然畫。時得
一二遺八九。我車旣攻馬亦同。其魚維鯨貫之
柳。古器縱橫猶議閭。零星錯落僅名斗。模糊半
已似癡脈。詰曲猶能辯跟肘。娟娟缺月隱雲霧
濯濯嘉禾秀稂莠。漂流百戰偶然存。獨立千載

誰與友。上追軒顓。相唯諾。下挹冰斯。同殷殷。憶
昔周宣。歌鴻雁。當時火籍。變蜎斗。厭亂人。方思
聖賢中。興天爲生者。考東征。徐虜闕。虺虎北伐
犬戎隨。指喉象胥。祿選貢。狼鹿方召。聯翩賜圭
齒。遂因鞶鼓。思將帥。豈爲考擊。煩矇眊。何人作
頌。比崧高。萬古斯文。齊岫嶼。動勞至大。不矜伐
文武。未遠猶忠厚。欲尋年代。無甲乙。豈有文字
記誰某。自從周衰。更七國。竟使秦人有九有。埽

除詩書誦法律、投棄俎豆陳鞭杻、當年何人佐
祖龍、上蔡公子牽黃狗、登山刻石頌功烈、後者
無繼前、無偶、皆云、皇帝巡四國、烹滅強暴救黔
首、六經旣以委灰塵、此鼓亦當隨擊、指傳聞九
鼎淪泗上、欲使萬夫沈水取、暴君縱欲窮人力、
神物義不汚秦垢、是時石鼓無處避、無乃天工
令鬼守、興亡百變物自閒、富貴一朝名不朽、細
思物理坐歎息、人生安得如汝壽、

宋梅堯臣石鼓詩爲雷逸老因呈祭酒吳公○石
鼓作自周宣王宣王發憤蒐岐陽我車我馬攻
旣良射夫其同弓矢張舫舟又漁縛鱣魴何以
貫之維柳楊從官執筆言成章書在鼓腰鐫刻
藏歷秦漢魏下及唐無人着眼來形相村童戲
坐老死喪世復一世如鳥翔唯閱元和韓侍郎
始得紙本歌且詳欲以氍毹歸上庠天官嬖阿
馳肯將傳至我朝一鼓亡九鼓缺剝文失行近

人偶見安碓牀、亡鼓作白刻中央、心喜遺篆猶。
在。傍。以。白。易。白。庸。何。傷。以。石。補。空。恐。春。梁。神。物。
會。合。居。一。方。雷。氏。有。子。胡。而。長。日。模。月。倣。志。暮。
強。聚。完。辨。外。經。星。霜。四。百。六。十。飛。鳳。凰。書。成。大。
軸。絲。錦。裝。偏。斜。曲。直。筋。骨。藏。攜。之。謁。我。巧。趨。踰。
我。無。別。識。心。徬。徨。老。向。太。學。賢。已。蒼。樂。子。好。古。
親。繚。邐。誰。能。千。載。師。史。倉。勤。此。冷。澹。何。肝。腸。而。
今。祭。酒。禪。聖。皇。五。經。新。不。新。兩。廊。我。欲。効。韓。非。

癡狂載致出關無所障、至寶宜列孔子堂、固勝
朽版堆屋牆、然須雷生往度量、登車裹護令相
當、誠非急務煩紀綱、太平得有朝廷光、山水大
字輦已嘗、於此豈不同粃糠、海閭異獸乘舟航、
連日道路費芻糧、又與茲器殊柔剛、感慨作詩
聊激昂、願因諫疏投皂囊、夜觀奎壁正吐芒、天
有河鼓亦焜煌、持此負鼎干成湯、

元揭傒斯石鼓○孔廟頽牆下、周宣石鼓眠苔分

敲火迹，雨洗篆蝸涎。野老偷爲白，居人打賣錢。
有形終易盡，流落漫堪憐。

明山陰唐愚士石鼓詩○郡學舊辟雍，中有岐陽
鼓。古今所聞十，左右各惟五。離離大星隕，兀兀
壞雲補。氣若鎔五金，文若斷釵股。孤峯割秋瘦，
千葩擢春嫵。森嚴列戈矛，爾雅冠章甫。摧輶半
折軸，敗舫或遺鏽。斷苔明碎錦，古墨漬潤礎。思
昔委秦郊，雷電驚草莽。耒牛礪其角，鑿臼加以

杵。幸今依黌宮，星日照廊廡。圭壁遜其儀，咀豆
與之伍。脫非天意憐，或是神明祐。深簷白晝永，
老屋祥鸞翥。晴連畫戟陰，冷濕官牆雨。諸生獲
講解，髦士資訓誥。啓鑰煩豎閣，捐本利商賈。韋
辭表姬周，韓語懷李杜。紛紛歐蘇作，詔屈鄭吾
譜。稱評雖靡定，仿佛詎非古。我生千載下，匏繫
三江滌。神徒馳周南，足不出城府。適從遼碣役，
遂作幽燕旅。平生慕奇聞，一日獲嘉覩。初臨邑

愈莊欲狎氣斯沮如親至東都揖讓中與甫如
親與田獵搏攫兒與虎羈愁破昏憤喜氣沃眉
宇時維躔壽星歲甲在疆圉天寒號鴈泉城荒
茂禾黍宗周本余懷覽古亦天與庠序重圖訓
蹠蹠愧庠序聊陳曹鄴風式繼韓蘇武

茶陵李東陽周石鼓歌○昔聞石鼓在太學鼓形
穹窿石榮留髫年釋褐隨班行未識研覃與揚
摧始官翰林歲分獻晚以代祀觀尤數我思古

以不可見，健筆雄詞，兩超卓。宣王謨列，繼成康。
况有文章存古朴，是時風俗蓋渾渾。其臣拜誦，
俱堅確。勒功太廟，告中興。講武岐陽，猶獵較。于
時旋凱奏，饒歌于時。殿言播，殷桑靈祇地不愛。
圖書列石，天然謝雕琢。垂垂版折，屋漏痕隱隱。
昏星露芒角，初如淮徐振師旅。壯士當場鳴劍，
槊又如申甫。端冠紳，擯相聯。堦舞于箭，年深歲
長，世運改。誰向鴻荒究繇邈，贏劉以後無此文。

直與混沌分清濁，驟看筆勢尋風骨。細剔苔痕
認班駁，原拋野擲墮榛菅。冬經雪霜夏冰雹，疑
鑿大鼎存銘識。似毀明堂露榱桷，當時十鼓一
爲臼。猶幸農家事春馭，愛惜應勞神護訶。搜尋
不厭山磽确，暗中摸索亦可知。辨口尚煩泣楚
璞，聖朝天子方好儒。森列戟門護重幄，聞之
興慕見興敬。以手摩挲防擊撲，我生學篆希前
蹤。下視俗書羞醜覿，家藏舊本出梨棗。楮墨輕

虛不盈握行年七十始研求老臂支撐目昏眊
拾殘補缺能幾何以一涓埃禪海嶽太原宋生
生好奇鐵筆爲予親刻劉吁嗟往者不復還庶
免方來盡漫剝請從祭酒告諸生誦此衣冠日
薰濯。

信陽何景明觀石鼓歌○我來太學謁孔廟下觀
戟門石鼓陳之罍詛楚已埋沒此石照耀垂千
春蒼昏蘚澁讀難下蟲影烏剝細不分古畫詰

曲蛟龍隱石氣慘澹烟霧紛周王功勳史籀筆
數石細落岐陽濱中興氣象豈復覩大篆意格
誰曾聞先秦文字稍近古兩漢摹搨多失真六
朝以來尚靡麗鍾王往往稱通神唐愈宋軾遞
歌歎長篇險韻何悲辛大觀之間入汴國君王
好藝崇斯文高駝巨艦遠載致金填玉歇傳相
珍靖康乘輿忽播蕩保和玩物隨烟塵神驅鬼
守散復聚至寶豈得空沉淪文皇北來定燕

鼎不置太廟留成均博士無煩上書請書生煩
得親講詢虛廊素壁安置穩大厦長檐覆蓋新
不隨鍾鼎怨磨滅已與璇琬爭嶙峋平生博覽
愛古跡世上墨本徒紛紛此雖殘闕歲已久尚
覺隻字輕千緡壁池日月動華袞奎閣星斗羅
貞珉嗚呼孔廟在萬世此石與廟長無湮

萃州王維楨石鼓殘文歌○我聞宣王石鼓史籀
筆文辭簡質字鉅利歲久剝落摹搨昏讀字不

得讀其意。我登汪君堂。見此倍惆悵。斷斷續續。
半形盡。中興有蹟隨彫喪。於乎文武成康忽焉。
沒。今小雅盡廢。禹淪泥。東都天子講田事。吉日。
堂堂聞鼓聲。岐山之陽廣且夷。馬同車驟徒衆。
馳。召從百辟修舊典。參伍齊足輝有儀。蕭蕭悠。
悠天風吹。一聲振山山爲披。沂水沔水魚瀾瀾。
天子之所網羅施。微罔從臣奏武成。爰請磐石。
勒斯銘。豈徒百辟匪舒放。要令千載知功名。人。

一言禽荒古有誠、彼美宣王罔攸解、
猘狁內侵蠻夷侮、我武不揚、我室壞、
安得與君蒐遺編、叅訂闕文、
裨完全、三代一字一事傳、
豈爲區區點畫論精研。

蒲州王家屏觀太學石鼓歌○我聞成周狩岐陽
宣王道得全全昌羣臣作詩刻永久辭高二雅
文三倉十鼓累累至今在、鬼護神呵更顯晦、
自岐徙汴復入燕、遭逢珍重休明代、
鴻都石經

久矣訛鼓文雖剝存者多後聖門牆後賢栢日
月風雨爲庠塾日埋金琢等輕易自然安頓森
嚴地今皇文治過成周講求折衷詞臣事辭
章規矩韓愈才八代推倒三代回政愁响嶮碑
孤絕爲歌石鼓相追陪

鄞縣沈一貫觀太學石鼓歌○我吟車工詩中語
感慨中興周尚武湯湯不禁汚水流簡衆安車
君可睹西東王迹令人嘆千載蹉跎傳石鼓雪

壓霜侵野火，燎牛羊。抵觸礪斤斧，窮荒一鼓更。
流遷作白田，家豳禾黍。不知爲雅復爲風，刪後
十章歸廟宇。膚澤半亡神骨居，剝剔不淨苔蘚。
古世間小篆隸八分，如子如孫從厥祖。憶昔先
王開明堂，蒐乘岐陽集纓組。獻禽每復勅成功，
日佳丙申吉庚午。一時勝事絕古今，子父燕然
安足數。逢逢辟廱鼓所都，鍾鼎盤彝此而五。方
今中興之，明主有臣壯猷叔。與虎南平鬼方

北平虜弓矢載櫜列干羽石鼓爲我驅前部

吉水劉應秋太學石鼓歌○自昔耀文德而以石

鼓傳鑿石作鼓何年事鼓上之文成敷宣有周
天子作辟雍簠業櫜櫜鼓逢逢文治衰非武不
振宣王中興歌車攻置晉徒蕭蕭馬駕言徂狩
岐之東亦有成羣色鴻鴈亦有不二心羆熊刻
石紀功成建櫜不用兵此石托山阿陵谷易嗟
異門淪社遁不如昨豈有神物相擁護太學諸

生讀能過。此石闕兩年蹉跎。二雅二南存僅此。
與爾說經爲爾歌。當年奏入明光殿。許令植鼓
於霧鬣。橋門無數觀聽者。感激奮發情如何。我
聞卻鼎薦太廟。義士或非笑。又聞瑯琊會稽詞。
功德誰見之。何如石鼓振金鐸。口舌教人無銷
鑠。金石有磨文不磨。先王後王代有作。嗚呼先
王後王代有作。斯文天地並寥廓。

東粵鄧宗齡觀太學石鼓歌○朝從子佩入成均

戟門翼室觀嶙峋、樸然古貌列兩壁、云是石鼓
王者迹、古畫詰曲幾千秋、苔蘚爲衣雲物幘、鳥
剝蟲雕跡未湮、古今讀之人太息、周道仇離我
心傷、宣王烈烈恢皇綱、吉日車攻修訓典、縱橫
轂轡岐之陽、籠山絡野布罽網、風毛雨血神飛
揚、九夏聯虞奏六成、匠石作鼓史作銘、桓桓武
武勢維競、君子有聞征無聲、石氣綢緼含太始、
鸞翔鳳舞翩斯起、刻苔剝蘚見前朝、中興此跡

自明主大呂元英豈足多、周彝商鼎差堪擬、祇
今 天子重大閱、石鼓石鼓寧磨滅、

華亭董其昌石鼓歌○世間相傳墨數書、五十六
種名目奇、中有岐陽石鼓跡、籀文千載存風規、
周道中興震威武、五年巡狩修上儀、朱芾赤舄
隨蒐狩、告朝還鑄金石辭、狀如天上落星石、剖
剝泥濁光陸離、雅頌之間格韻古、尊彝並列款
識施、千年枯石經蟲琢、百丈斷崖蟠蛟螭、務光

初髹倒薤目。神禹手鑿岫嶂時。數行剝落不成
字。仲尼刪後賞者誰。嗟嗟秦人埽王迹。儒者六
藝皆凌夷。隸文一起籀文廢。俗趨簡便真難支。
鄒嶧之罟俄歇滅。陽冰猶自尊相斯。神呵鬼護
石鼓在。三代典刑良可推。吾聞吏部希古道。二
代三斗稱宗師。絳牋餘習混雅正。眼看槌碎淮
西碑。以茲感慨叩石鼓。裸如三搥聲。謹悲。寄言
同學鴻都子。共挽文章八代衰。

南充黃輝石鼓歌○成均橋門列者石、相傳周宣
員獵迹、蒼勃時時雲氣生、倒薤依微破苔隙、彷彿
嫺皇五色墮、錯落星辰尚堪摘、此石閱人人、
遞喜昌黎先生好、尤癖可憐光價絕、鼎鍾霜草
風沙無憐惜、元和到今復幾歲、流落尤能脫臼
碣、金縷斷鈕玉何逆、蟬榭何繇見光澤、孔子刪
詩偶遺漏不錄、片碣誰搜索、或疑成後蒐岐陽
椒舉之言、具楚籍車攻、卽類宣王詩、四牡東徂

豈西適。周家蒐苗。世有事。平岐賊維定。何擇大
策。分明史稿手。詛楚卑卑。其能役。况復李斯七
日歎。弱骨今猶相碣嶧。此書穆滿當伯仲。爭令
支孽掩宗祏。宇文偏陋復安取。一笑豎儒揣量
窄。甄豐奇字誠辱收。六體判堪證。今昔位置何
須爭。甲癸參差枉自疑。君自。從教缺剝費摩挲。
古意居然存者碩。顯晦隨人亦有時。一出雍涼
幾爲客。小雅終存王者氣。夜夜精光炭相射。護

持豈爲就奇字。想像中興在明辟。方今太平無
一事。風雅蕨蕨孰摛撫。但令夢寐到成宣。隻字
猶湛動心魄。老生更訪吉日碑。別盡崑崙亦何
益。嗚呼石鼓歌成誰獻聞。槐市陰陰土花碧。
遂安方逢年石鼓。落落石鼓曾孫之武臣。籀書
之誦者。臣虎。十鼓九夏。孔所刪者。車攻吉日。擇
其言雅。石鼓十章。歸于原野。秦銷其金。鼎乃泗
沉。秦灰雜揚。經乃壁藏。石鼓十章。遊于陳倉。其

一鼓獨受杵以腹神或使然一還九族作采金
焉使夷致燕金脫文存以開帝先辟雍皇只
陳甲至癸樂雍論鼓於皇多士日佳壬申古我
成均吉日癸巳壽矣弗倫天子萬壽鼓兩左右
先平于爽正石鼓歌○於樂文武周道尊粲然中
興曰靜孫駢駢翼翼武之服樂夷稽首舞狝奔
太平不令五戎墜駕言蒐狩田車邁小狝大兕
獸所同以燕天子御賓佐兩時陳詩紛簡牘佳

篇已入尼山錄所不錄者辭縱橫三百無傳傳
以樸完欽半滿閱乾坤自甲至癸數則存君莫
空悲失去宗殘鈎剩畫完精魂我 皇鑒定列
璧水漢唐宋儒皆歡喜及今磨泐未盡刊請從
經外疏至理

莆田郭天中石鼓○鼓非石質者星文非鼓勒者
銘焚外書刪外經經雅頌書典刑隸秦漢徑睽
庭篆龍鳥藍泐青日謝朓春轂停嵌辭金波畫

零我拜手神之聽

文丞相祠

今順天府學因宋文丞相義盡之柴市祠丞相學
官中曰教忠坊丞相廬陵人廬陵人祠丞相學官
外曰懷忠會館教忠長上志懷忠臣子志也洪武
九年北平按察使司副使劉崧始請建祠永樂六
年太常寺博士劉履節奉命正祀典始春秋祭
于有司祠二碑一楊士奇一羅倫按公授命至元
壬午十二月初九日風沙晝晦官中皆秉燭行百

官入、亦秉燭前導、世祖以問天師張、悔之、贈公特
進金紫光祿大夫太保中書平章政事廬陵郡公、
謚忠武、命王積翁書神主、洒掃柴市、設壇祀、丞相
李羅、行初奠禮、旋風起、捲神主、雲中、雲中雷、噀、噀、
如怨聲、晝逾晦、乃改前宋少保右丞相信國公、天
乃霽、明日歐陽夫人從東宮、得令旨、收公、江南十
義士、昇、匿、某都城小南門外、五里道傍、誌其處、大
德二年、繼子陞至都、順城門內、見石橋、織綾人婦、

公舊婢綠荷也。爲陞語劉牢子，乃引到匿處。大小
二僧塔，其大塔小石碑，刻信公二字。置塔南石址
焉。至元二十年，歸葬廬陵。

吉水胡廣謁文丞相祠○丞相生異質，挺持真天
人，勁氣薄霄漢。國亡以軀殉，方當橫犇日。盡瘁
任艱辛，上書抗直言。屢欲斬賊臣，回翔沮蝨蠹。
素抱欲艱伸，大事已云徂。乃令秉軸釣，降表夜
竊出。六宮竟蒙塵，嗟彼賣國者。致公何狡獪，萬

死出虎口、努力支蒼旻、崎嶇走嶺海、顛沛念君
親、勸旅以勤王、臨危焉顧身、徒手格猛獸、胡馬
正銑銑、勢窮猝被執、取義以成仁、甚貴景輿勝、
豈憚弘範噴、悵望伶仃洋、欲濟迷遠津、天高憐
戢翼、水涸悲縱鱗、羈縲詎遑恤、行從經三春、從
容以就義、慷慨怒日曛、辯論辭不屈、厲聲若震
霆、聞者皆吐舌、爲公却逡巡、宋無不道君、而無
可弔民、大命屬更革、皇路哀沉湮、所學希聖賢、

臨死載書紳。天以公報宋。亦以全公純。光明暴
天下。萬古終寡鄰。道增名教重。志競日月新。煌
煌忠節傳。有讀必沾巾。聖明啓隆運。褒典昭
儀文。祠廟學官傍。歲時肅嘗禋。重爲事君勸。永
以敦彛倫。

豐城李裕成化辛卯八月望日遣祀文信國因賦
○宋祚日益微。胡元肆羶腥。公歸在田野。奮出
罔顧身。無乃扶綱常。忍視大厦傾。累陳備禦策。

宰執以迂稱。臯亭時見留。間關度儀真。幸而脫
虎口。饑食餘糝羹。乘艫潛入溫。王室圖復興。君
親痛在念。崎嶇奔滄溟。諸鎮徧移檄。到處皆胡
兵。豈無勤王者。勢孤力弗勝。倉卒飯五坡。被執
經北平。絕粒乃復蘇。哀歌歎零丁。召見固不屈。
三載拘幽圜。人生異夷狄。所貴義與仁。慷慨論
大節。從容以就刑。所學聖賢事。誠不媿所生。煌
煌青汗竹。勁氣凌蒼冥。

長州姚廣孝文丞相祠堂○凜凜宋忠臣赫赫元
世祖禮遇各有道聲光照千古舊祠燕城東松
栢森牖戶英靈貫日月勁氣鼓雷雨有司奉朝
命維時薦芳醑客來拜庭除欲退復延竚

石首楊溥過文文山祠○丞相名何重遺祠世共
尊乾坤柴市遠日月蕙樓存一死銷胡運孤忠
報宋恩中原還正統辛苦向誰論

永豐魯棨謁文丞相祠○國事艱危屬秉鈞平生

慷慨竟捐身。百年社稷歸元主。萬古祠堂表宋臣。已見高名垂宇宙。還瞻遺像肅簪紳。莫疑碧血生芳草。留得忠魂歲歲春。

石首韓守益文丞相祠○烈烈孤忠一旅師。奈何興廢出天爲。黑光盪日陳橋變。青氣移星海島悲。風黯西郊麟獲日。霜枯上苑鳳來時。六歌留得儀容在。柴市千年足慘思。

河津薛瑄謁文山祠○朔氣蕭森歲向深。揮戈救

淚動哀吟、艱危已竭、回天力、慷慨猶存、捧日心、
海水尋常、秋月冷、燕雲千里、暮星沉、悠悠往事
都如夢、只有孤忠照古今、

常熟桑悅謁文山先生祠○衣帶留題誓始終、小
樓數載履虛空、誰云到死方無悔、要識持危不
是窮、異物化生真幻語、元神出現亦精忠、堂堂
祠宇還柴市、朱室全收養士功、

無錫秦金拜文山先生祠○文武才兼絕代雄、每

從青史識孤忠、合生、忍死、心何壯、取義成仁、道
不窮、廟祀蔓延千載後、旅、覓、悽、斷、六、歌、終、茫、茫
朱、祥、淪、滄、海、養士誰收第一功、

無錫邵寶詩文信國祠○春色無端滿地、茲傷心
燕市偶經過、清風又讀忠臣傳、白、日、如、聞、正、氣、
歌、社稷一身惟死是、華夷千古有名多、瓣香未
了生平拜、回首荒祠獨奈何、

吳縣王鏊謂文丞相祠○義氣橫天白日陰、巍然、

遺像學官深，千金欲得留侯士。三擊難回豫讓
心，自昔奸諛誰不死。如今元社亦銷沉，黃昏柴
市風沙慘。回首行人淚不禁。

重弔文丞相祠○漢朝冠蓋盡胡元，窮海累臣
抱獨冤。請劍便須遊下地，結纓何處是中原。青
泥不化萋弘血，白浪空歸伍相魂。斜日再過柴
市路，風雷千古浩猶存。

蘭谿章懋謁文文山祠○教忠坊下拜祠亭，懷古

令人仰德馨，百代衣冠知守死。一朝文物自鍾
靈，孔仁孟義公無規。宋廢明興神可寧，往事
是非昭簡冊，豈容蹤跡共塵冥。

莆田黃仲昭謂文丞相祠○故宮芳草泣銅人，滄
海樓船是紫宸。赤手欲擎西墜日，丹心誓掃北
來塵。山河萬里雙垂淚，廟宇千年獨怡神。翹首
燕山知幾仞，至今高節共嶙峋。

長安林廷玉謂文丞相祠○國破天驕萬蟻屯，捐

軀猶欲正乾坤，千年廟貌公生氣。萬古綱常客，
斷冤苔照白雲封石篆。柏拖寒雨障祠門，陳詞
踞灑汎瀾淚。天地酸心日月昏。

鶴洲周瑩謁文丞相廟○海上干戈百戰中，孤舟
夜夜泣英雄。八千里外胡塵合，三百年來宋曆
終。厓嶺被俘真倉卒，燕山就義太從容。西風吹
雨過柴市，獨向祠前拂短松。

長洲文徵明文信國祠○南北間關百戰餘，此身

宗社許馳驅。可憐功業孤魂在。自決存亡大義。三
俱。夷狄至思猶歎服。皇天無意竟何如。平生心
事堪誰訴。漫托他年半紙書。○地轉天旋事事
同。老臣臨市自從容。誓將西嶺填東海。忍著南
冠向北風。千里勤王空赴難。百年養士獨收功。
成仁取義人人分。未用區區獨弔公。

餘姚趙錦謁文文山先生祠。○萬折猶聞水必東。
精靈疑在列星中。未論恢復當時事。須信綱常

百代功俎豆年年來。帝遣驂螭夜夜駕天風。
新祠今古留柴市。何處黍離元故宫。

萬安朱衡謁文文山先生祠○數椽祠屋祭城東。
孤柏亭亭想像中。柴市一腔酬主血。宋家十葉
養賢功。冠裳畫影中原日。甲馬宵鳴薊北風。一
自皇朝還正統。忠魂常傍大明宮。

茶陵譚希思文丞相祠○黯黯黃塵白日昏。蕭蕭
胡馬擾中原。山河空灑孤臣淚。嶺海難廻二帝

轅左袵衣裳淪社稷南征氣節壯乾坤
颶風却恨天無意銷盡孤忠萬古魂

南海歐大任謁文信國祠○憶昔南冠日
厓山恨未忘魂沉柴市月淚盡薊門霜
白鴈啣江草黃龍逐海航中原冠劍在
歌舞待巫陽

錢塘葛寅亮文山祠贊○當五坡被執
絕粒而復蘇公以爲天未絕宋也不聽
死吾小樓三年其意在趙氏之孤蓋宋
絕于柴市之殺文山非絕

于厓海之溺秀夫義盡仁至謂一死竟公志者
未識公所隱圖是知其不可而爲之者乎是知
其不可而爲之者乎

順天金鉉謁文丞相祠○剝復自天運臣道無中
窮君子切載輿豈與氓蚩同痛矣文山子事去
生其躬誕芸香歲寒不望以豐功結束宋文章
巍巍葬兵戎一部十七史論語半部終棘行若
履坦所在吟淒風三年小樓上息息宋運中若

遂黃冠去。仍來成旅攻。當時生祭者。何足語微。
衷。柴市風雷在。千年教臣忠。拜讀正氣歌。讀罷
神明通。

水關

京城外之西堤、海淀、天涯水也。皇呈城內之太液池、天上水也。游則莫便水關。志有之曰積水潭、曰海子。蓋志名而游人不之名。游人詩有之曰北湖。蓋詩人名而土人不之名。土人曰淨業寺、曰德勝橋、水一方耳。土人曰蓮花池、水一時耳。蓋不該不備、不可以其名。名土人口水關是水所從入城之關也。玉河橋水亦關矣。而人不之名。是水所從出。

城之關也。或原焉，其委焉者，舉之，水一道入關而
方廣，卽三四里，其深矣，魚之，其淺矣，蓮之，芰芡之，
卽不蓮且菱也。水則自蒲葦之，水之才，北水多
鹵，而關以入者，其水鳥盛集焉。沿水而耕，耕聖者
亭者，因水也。水亦因之，梵各鐘磬，亭墅各聲歌，而
致乃在遙。見遙，聞隔水相賞，立淨業寺門，日有水
南，坐太師圃，晾馬廐，鏡園，蓮花菴，劉茂才園，日存
水北，東望之，方圍也。宜久，西望之，漫閣，浣園，楊園。

王園也。望西山。宜硯深深之太平庵。蝦菜亭。蓮花
社。遠遠之金剛寺。興德寺。或辭衆賤。或講華游矣。
歲初伏日。御馬監內監。旗幟鼓吹。導御馬數百。洗
水穴。歲盛夏。蓮始華。晏賞盡園亭。雖蓮香所不至。
亦席。亦歌聲。歲中元夜。孟蘭會。寺僧集。放燈蓮
花中。謂燈花。謂花燈。酒人水嬉。縛烟火。作鳬雁龜
魚。水火激射。至萎花。焦葉。是夕。梵唄鼓鐃。與謠歌
絃管。沈沈昧旦。水秋稍閑。然蘆葦天。菱芡歲。詩社

交于水亭。冬水堅凍，一人挽木小兒，驅如衢。曰水
牀。雪後，集十餘牀，鑪分尊合，月在雪，雪在水。西湖
春，秦淮夏，洞庭秋，東南人自謝，未嘗有也。東岸有
橋，曰海子橋，曰月橋，曰三庵橋。橋南北之稻田，倍
于關東南之水面。

元馬祖常海子橋○朝馬秋鹿急天潢曉鏡舒影
圓雲度鳥波靜藻依魚石棧通星漢銀河落水
渠無人洗寒露爲我媚芙蕖

元盧亘海子上卽事○馳道塵香散玉珂，彤樓花
暗弄雲和。光風已轉瀛洲，草細雨微，添太液波。
月榭管絃催曙發，冰亭簾幙受寒多。少年易動
傷春感，喚取青霞對酒歌。

元宋本海子○渡橋西望似江鄉，隔岸樓臺罨畫
粧。十頃玻璃秋影碧，照人騎馬入宮牆。

明永豐曾際海子橋○鯨海遙通一水長，滄波深
處石爲梁。平鋪碧甃連馳道，倒瀉銀河入花牆。

晴絲乍添垂柳色，春流時泛落花香。微茫迴隔蓬萊島，不放飛塵到建章。

太平謝鐸過北海子，因憶賓之相約不果。○烏外青山昨雨過，馬頭西望翠巖幾。烟光平墮寒雲起，秋色空明水氣多。岐路有情方坎壈，客心無賴益蹉跎。歸來莫怪相期晚，不出從臾奈爾何。泗州郭鉅與王虛諸進士同遊荷花池。○迢迢去遠浦，汎汎沂前川。落日山水秀，輕風鴈鷺賓。

客恣歡笑，清吹雜哀絃。雅志無越度，幽懷可盡
宣。

亳州朱宗吉九日集蓮花池○秋風吹燕臺，木葉
落我前。寒衣又砧杵，游子悲經年。偶聞節重九，
携酒向湖天。漁歌操北音，水鳥閑自然。澄波白
日下，蒲柳寒已烟。風色一何似，客歸豈不賢。

公安袁宏道游北城臨水諸寺至德勝橋水軒○
西山去城三十里，紫巘青巒見湖底。一泓寒水

半庭步賺得白雲到城裏。芙蓉濃濃遮雉朵。野
客登堂如登舸。稻花水漬御池香。槐風陣陣宮
雲涼。一番熱雨。蹙波沸。穿簷撲屋生荷氣。乍時
潑墨乍清澄。雲容閃爍。螭蛟戲。簾波斜帶水條
煙。北窓雨後。蔓清圓。兌將數斗薏仁酒。賃取山
光不用錢。

暮春遊北門臨水諸寺至德勝橋水軒待月○
一曲池臺半曉花。遠山如髻隔層沙。南人作客

多親水、北地無春不苦沙、熱馬慣行溪柳路、
僧解點密雲茶、滿川澄月千條縷、踏踏蒼波過
幾家、

北安門水軒○秋容瑟瑟上菱蘆、湖上青山鏡
裏姝、碧瓦黃牆官樹裏、湧金門外看西湖、

延平田一儁蓮花菴避暑○人天獨步滌煩襟、鐘
磬偏能入客心、石澗泉鳴晴亦雨、松堂烟遶午
常陰、寒絃細向風前聽、冷簟翻疑月下侵、却惟

當年飲涇朔，不來此地避招尋。

新建鄧以讚蓮花菴。○霧起雲低作夕陰，雨餘荷
氣四邊侵。一秋僻寺時休暇，半晌餘鐘夜淺深。
湖上月生孤片影，草間蟲老久高吟。年來漫習
山僧味，始向塵中靜此心。

東門子慎行兩行北安門外湖上。○湖上題欄如
畫舟，一天涼雨入官秋。平橋蘆荻蕭蕭冷，別浦
鷗鳬汎汎流。霧色近迷三苑樹，月光遙照五城

樓時清湛湛多濃露，十里芙蓉接御溝。

蓮花菴潭上夕飲○禪宮遙倚北樓開，樓下平
湖落照來。金水環城，金象漢，蓮花湧，寺宛成臺。
諸香各捧空王座，一葉能浮太乙杯，便是忘歸
歸亦醉，夕陽清角莫相催。

吉水劉應秋九日集淨業寺湖上○菱荷池上遠
鴻飛，望處西山翠不微。白鶴仙人頻換酒，青蓮
釋子爲開扉。坐依綠樹縣蘿影，閒看青濤映草

屏日暮笙歌雙闕霽。太平天子正垂衣。

餘姚孫如游淨業寺○禪堂入暮可曾開。馬逐飛
花向此間。鐘界朝昏應自急。水流深澗正如閒。
蒼然野岸燈初過。迢爾疎林月始灣。風定湖光
分半翠。不知是影是真山。

江寧願起元秋集淨業寺湖上○昨夜微霜下玉
河。垂楊幾葉着澄波。風傳清磬雙林近。月冷疎
砧萬戶多。青飯乍分天女供。紅牙徐按雪兒歌。

佳辰好友湖亭集，豈忍新秋酒漫過。

景陵鍾惺集淨業寺水次，再過十方菴，看荷花，因宿其中。○如此匆匆際，禪樓肯再來。曾無三日隔，又見數花開。童負桃笙至，僧籠菜甲回。出門拚一宿，無復候人催。○每憶經行處，重遊勝昔遊。往來能漸熟，耳目自多幽。水氣窮昏旦，林聲閱夏秋。晚花不無意，客散獨相留。

新昌戴九玄集淨業寺湖亭。○湖月林風誰是主，

又魚踏藕自留宿。頻尋柳色城邊路。獨占秋光
醉裏身。敗葉疑鷗浮。漸遠。老僧如鶴瘦。堪親隣
家亭子終年閉。不教蘆花笑殺人。○湖上濠邊
秋色深。蓼花蘆葉共蕭森。平潭樹逐波光動。隔
岸林連夕照陰。鷗夢乍驚隣寺磬。鴻聲欲度滿
城砧。涼風莫更翻荷露。客袂颼颼恐不禁。

公安袁中道北湖觀蓮○如何應十丈。有此芙蓉
池。雨至綠先暗。風來紅亂飛。深潭藏冷鳥。沙岸

走歌兒，亦愛無花處。雪浪奇。

曲周劉榮嗣遊淨業寺。○塵事溪邊淨，游思雨後
濃。于君歡識面，久我想臨風。樹影移殘席，荷香
度遠空。飛樓俱不係，暫此失樊籠。○溪過人人
影，林開事事幽。萍光分酒綠，波色與雲浮。禮設
非因我，機空亦有酬。如何相約久，今日始同遊。
○所快清吾友，尋同水一窩。鳥鳴相競雜，酒政
未妨苛。眼耳忽空濶，鬚眉總笑歌。歸途雷雨逼。

其奈夕陽何。○小樓簾箔影密，共柳絲垂。若得
舟行處，何當月上時。水明疑未夜，山遠畧如眉。
便可投竿隱，甘忘漁父期。

淨業寺再送張仲錫○卽奉王程亦有期，暫停
華轂問漣漪。弟兄如水論心事，花葉同香遞別
離。他日玉溪光裏坐，可猶淨業酒闌時。採荷莫
厭蒹葭隔，露白霜嚴使，我思。

社集劉閑賦得蟬噪林逾靜○七月荒荒遲，斜

陽漠漠陰涼多。羣籟息。風定一蟬吟。聊爲傳無
語。于焉寄有心。盤桓仍此地。忽訝入林深。○已
與煩囂隔。稍從汗漫遊。都忘樹間響。但覺坐來
幽。野色聲中變。雲光意外秋。寂喧殊自領。對此
倍悠悠。

立春日米仲詔邀集漫園○結侶同幽賞。佳遊
不厭賒。看雲來野岸。問柳到僧家。寒氣通春信。
迴風逗雪花。心關石徑草。青動幾分芽。

丹陽賀世壽漫留水次看洗馬○風吹鸞旂競水
涯珠纓玉勒爛成霞嘶雲意似矜閒闔歷塊姿
將傲滌注銀漢房星光上下瑤臺神駿影參差
驚濤沫噴揉文轂淺岸蹄驕蹴落花天底承恩
餘意氣中官啣命亦光華晚歸紫翠前山亂幾
隊橫穿柳陌斜

順天米萬鍾花朝前一日集劉伯世鏡園○湖涯
寒不去花信未分明土動青方茁枝疑綠尚輕

斷驚山影碎。顧曳岸容清。莫道春還寂。沙汀已
雁聲。

漫園初成○紀勝無勞出郭輿。臥遊耽聽日堪
書。嵐衝石髮縈山帶。梵挾松絃韻木魚。狎主風
烟俱老大。慣親陽鳥獨迂疎。偶從圖畫新摹得
疑向江鄉乍卜居。○三年放作北山農。時看狂
雲失亂峯。歸沐棲雖仍落落。樂餞流幸枕淙淙。
鑑湖他日無須乞。彭澤清時好自容。桃李笑非

零露地、且依秋水醉芙蓉。

立春漫園社集○歲開春反後、步向凍湖溪、試
緩問遺雪、疑青尋隔堤、淑新蒸柳潤、霽暮合山
齊、莫緩冰車戲、東風漸解澌、○未春期社集、朋
玉候春齊、晚駕冰筇左、昏攀閣眺迷、藉登生薄
煖、度曲學鶯啼、膏雨如留醉、濃陰覆席低、

麻城陳以聞立春日米仲詔招集漫園○水閣山
親望、居然丘壑中、陽過多歲莫、重到與春逢、醉

語停杯盡。郊容得候通。數星高點綴。已映禁城東。
○此地無塵事。寒光接遠空。柳如先。冰裂。花
欲借燈紅。冰渡爭迎岸。雨絲細。陰風霏霏歸騎
晚。心與御河東。

遂安方逢年水關夜憩○月娟娟似迎風謾謾其
鳴烟水以神盪林泉之僻生有濠濮間想與鷺
鷗輩盟拙矣塵中客悠然靜者情

重遊水關○馬頭塵靄歎望水遙則喜古寺叢

以羅澄湖曲而此柳爲水衙官。烟爲水畫史。散步道心生。勞人空率爾。

米仲詔園○爽閣傍湖顏。流雲入壑閒。花開新月度。藤格古風刪。字瘦思摹鶴。詩清每賦山。高齋饒韻事。攬涉不知還。

山陰丁乾學淨業寺○城下瀟泉好。風來波亦生。荷鷗塵外韻。蟬急靜中聲。疎柳絲絲弱。斜陽點點明。偶來竟日坐。褊子不知名。

桐城倪嘉善飲北湖亭子○境曠復清望城西山
數岑鐘隨風處遠○水見月中陰○湖石支如骨○秋
荷開向心○酒深歌漸少○炬火過前林○

如阜李之椿辛未立春社集漫園○年光初入社○
昨日尚殘年○樓覺牕風可○水含春氣先○梅亭驚
見蝶○柳岸醒將烟○生○滋○詩○停○酒○燈○燈○照○管○絃○

華亭釋灋止秋莫集鏡園○天迴使秋瑟○湖清與
鏡俱○波文來越練○水調按吳歊○藻敗雲全影○荷

銷雨不珠。虛疑農墅裏。是喜帝城隅。

鄞縣薛岡飲淨業寺堤上。○堤至水俱至。游將影
與同。波從寺門碧。蓮似晚天紅。蟬響行人裏。鷗
眠醉客中。坐來香車陣。欲雨滿林風。

長洲周光祚過德勝橋淨業寺看荷花。客久江
南夢。朝尋城北遊。蔗芽湖綠黛。柳匝幙青油。擁
寺千花艷。巡堤一鷺幽。爲生車馬色。從未試扁
舟。○聽向無塵處。過橋得水莊。雨愁荷柄弱。風

喜柳絲長，乍入暑全去。言歸身滿香，緩行隄不
已，只此似吾鄉。

京山鄭友玄北湖歌○四十里外城西山，青過城
中照湖綠。湖水綠也到青山，水荷岸柳相連屬。
幾家亭館繁，無船亦不河。房棧高足樓，廳端正。
接街衢，肯留餘地生。委曲一樓三層換，三面告
我湖光山光續。一園荒軒老數株，告我雕裝正
粗俗。將霽未霽北闕烟，登登望望通晴曛。幾亭

酒罷幾歌停，斜陽已與婁清觸。

桐城方拱乾雨夕過淨業寺看荷候月○遙知月
意自花生，月後花先爭蔽明，看到淋漓光不礙，
坐來寂歷艷無聲，火非漁亦紛懸樹，峯以烟能
倒入城，久照澹殊忘所戀，客殘僧睡暢孤行，
蓮花菴水邊○薄暄生，雨後水已具，荷情影入
寺相亂，青惟柳可爭，風翻鷺力勁，日接浪光平，
小憩當塵積，江南畫裏行。

昌平韓四維飲水關湖上○山光連市口、水氣濕、
城、屢、擊、鼓、誰、家、月、臨、風、數、處、簫、韻、題、分、永、夜、人、
物、計、今、朝、喧、醉、無、高、簡、難、令、秋、寂、寥、○風、日、閒、
過、此、心、情、草、木、知、遠、山、曾、故、舊、好、友、省、言、詞、病、
理、安、棋、局、年、荒、窄、酒、卮、烟、波、不、盡、望、長、是、苦、吟、
時、

再飲水關○日與塵塵逐、名園喜有招人、家、烟、
在、水、秋、氣、夜、聞、簫、樹、驛、當、山、面、蒲、深、過、柳、屢、坐、

看酬醉少明月已中宵

平湖陸啓法德勝橋水次○誰識此

登城忽

渺然湖間虛失岸。柳外野疑田。荷老秋生氣。雲
興晚作天。非緣塵不到。自不與塵緣。

絳州韓霖上巳前一日集漫園○門前車馬路。入
戶卽幽偏。丘壑石盤具。樓臺燈裏懸。山圍城郭
入。水共御溝連。樂意通魚鳥。幽情廢管絃。看雲
驚月出。踏雪憶年前。林遠無邊地。霞生欲暮天。

賞窮晷旦候遊靜夏秋先。觴咏成良會。寧須令節傳。

邛州劉道貞辛未上巳前一日集漫園○開地藏
天水開扉引鏡湖。高人存野致。幽事貴王都。氣
借西山爽。流分太液隅。驚情嫌釣艇。曠想在菰
蒲。汗漫宜真逸。空明漏畫圖。曲房穿洞壑。高閣
上虛無。柳覆纔鳴鳥。烟移見浴鳬。岸容生遠意。
峯態變斯須。位置窺經濟。冥栖謝走趨。春將風

日美地與主賓娛。補石驚神鏤。簷燈散夜珠。不
辭終夕醉。歸路靜無虞。

夏邑王承曾淨業寺湖上作。○只有濃烟住。我我
淨絕塵。避人蓮水面。選地坐湖濱。蓮遠飛香冷。
錦清送曉新。到來長夏靜。覽得尚餘春。

會稽馬光霖蓮花菴。○坦步看新水。荒林綠欲起。
云云歸一亭。尤景攝遙紫。

京州吳惟英蓮花菴。○去年香裏客。今復到荷隄。

淺水兼天濶，新蒲與岸齊。
鐘傳高閣遠，柳覆小橋低。
指點村烟起，歸心促馬蹄。

冬日北湖水船○寒凝湖面鏡平開，小艇猶拖
古樹隈，不是路從銀漢轉，也疑人自玉壺來。
鏗鏘一葉能多載，滑滑雙桃亦屢催，無事戰兢愁
颭薄，酒深月上放船回。

大興韓弘達秋日集漫園○秋氣不可暮，圍圍散
空明，秋天四望佳，錯互層樓上，樓影與湖光，搖

若山俯仰疑波海屋爲以供人天享

華亭汪曆賢淨業寺水亭對月○地惟閒此月客
始有孤亭羣動定無擾纖塵靜不形水香含宿
藻村影江寒青往在湖山曲方茲未育冥

初秋雨後范質公招集淨業寺水亭看荷○輕
陰猶爾護疎紅霽後日光對忽空新爽到衣還
自柳定香吹雨不因風人經冉冉流波外秋在
亭亭送影中欲息幽尋心每共恰當佳月待橋

東○早花颯颯逐烟空。湖雨今朝不復紅。馬伴
主賓神自簡。香深語默靜能通。鏡看妝洗初如
月。臺想衣輕欲化風。肯信江南歸夢遠。盈盈猶
見榜歌中。

冰湖○我始識冰湖。湖光詎能隔一堤。上下天
一泓。徒與地。日月掛寒枝。影若新在紙。昔于湖
南觀。以月擬積水。欲見物盡浮。其極固靜止。堅
柔曷短長。春吾將過此。

蘄州王可象漫園泛冰牀○水有時凝釋因之別
有船一人驅在陸千頃冷如天遠岸猶棲雪踈
林有凍烟江南于此候茗酒閣中傳

麻城劉侗醉後據冰牀過後湖○立春冰未覺尚
可數人航固結深冬力熹微寒日光坐觀思解
泮中渡且康莊醉裏知前輩倥傯語復長

蘄縣汪逸冰湖○一片空明兩岸蒼望來猶道是
波光看人踏向中流去不藉蒲帆與石梁○短

我聊憑尺纜牽各携尊罍到湖邊。恐寒雜坐歌
兼笑、人、影、層、層、鏡、裏、天、

吳橋范景文淨業寺湖亭○湖容大半入秋工。領
畧尤當在雨中。水氣易陰仍近夜。荷香因靜不
關風。波間坐石聽吞吐。雲際看山想異同。對寺
心如花不染。味來茶韻亦能空。

湖上夜起○不獨坐慵睡亦慵。起同鶴步破苔
封。霜華漸濕晴爲雨。天水相涵影似重。就月經

行疑積雪、聽濤移坐近寒松、爐香方炷心應寂、
林外猶嫌度遼鐘、

長洲文震孟登北湖壺天閣○佳辰聊復一登臺、
小閣踈窓曲曲開、百頃湖光還澹蕩、重城山色
更崔嵬、時名正可拋詩卷、世事惟應付酒杯、望
望冥鴻吾有意、群飛鷗鳥莫相猜、

晉江黃景昉同閃中畏李括蒼集太平菴○與子
逢休澣、良遊興未孤、地偏藏艾柳、身已伴鷗鳬、

野艇繞容膝、新蓮漸放、鬚老僧能好事、隨意飲、
伊蒲。○不遠城隅、勝風塵已覺、寬隔溪、鳴布穀、
新果薦文官、鐵瓦通泉古、冰壺濯夢寒、春衣仍
可典、無畏酒杯乾、

定國公園

環北湖之周。定園始。故模莫先。定園者。實則有思。致文。理者爲之。土垣不聖。土池不甃。堂不閣。不亭。樹不花。不實。不配。不行。是不亦文矣乎。園在德勝橋右。入門。古屋三楹。榜曰太師園。自三字外。額無扁。柱無聯。壁無詩片。西轉而北。垂柳高槐。樹不數枚。以歲久繁柯。陰遂滿院。藕花一塘。隔岸數石。亂而卧。土塼生苔。如山脚。到淵邊。不記在人。家園野。

塘北、又一堂臨湖、蘆葦侵庭、除爲之短牆以拒之、左右各一室、室各二楹、荒荒如山齋、西過一臺、湖于前、不可以不臺也、老柳瞰湖、而不讓臺、臺遂不必盡望、蓋他園花樹故故爲容、亭臺意特特在湖者、不免僂達矣、園左右多新亭館、對湖乃寺、萬曆中有築于園側者、掘得元寺額、曰石湖寺焉、

丹陽賀世壽、崇定國公園亭○郊市塵方急、行宜向水涯、弄、清、濁、鳥、含、韻、淺、深、花、斷、雨、知、冷、

穿曦射故斜，隣僧能好客。扶策餽初瓜，○淪漪
一曲水。好友坐幽偏，秀濯花霏雨。清疎柳著烟，
晴瀾明倒影。銀浦寫遙天，總覺無塵事。觀魚過
檻前。

固陵余廷吉遊定園○一徑濃陰合，行行似野扉。
穿林榆影亂，隱几鳥聲圍。曲水涵山定，翻荷向
座輝。遲回應不厭，月墮醉方歸。

京州吳惟英社集定國公園○城西喧未去，輒得

此園林、柳碧午亭暗、荷香暑坐深、鶯堤通比岸、
雉堞隔高岑、荒落澄湖曲、塵飛了不侵、

山陰張學曾社集太師岡○苑外湖光淨、橋西野
色分、花晨先着雨、亭午不飛雲、同客俱鄉思、微
詩得酒琴、清遊餘戀戀、直馬散斜曛、

金剛寺

金剛寺。卽般若菴也。背湖水。面出巷。蓋捨棄光景。
調心坊肆。菴者。泊然猛力。使人悲仰。舊有竹數叢。
小屋一區。曲如徑。在村。宛若山藏寺。僧朴野。如自。
未入城市人。萬曆中。蜀僧省南大之。前立大殿。後。
立大閣。廊周室。審與焉。工未竟。南歿。方僧爭宇。以。
訟。桐城諸紳。迎蘊璞住之。蘊璞。同省南師。雪浪者。
雪浪具大辯才。講經四十年。然不著一字。蘊璞居。

此八年則著金剛復喻心經鈔柄等書。蘊璞歿。方
僧又訟焉。寺西廡。石刻金剛經。人書一。分署宰官
名。代筆也。士大夫看蓮北湖。來憇寺中。僧竟日迎
送。接譚世事。折旋優嫺。方內外無少差別。

長洲葛一龍正月十六夜。過蘊璞于金剛寺。○禪
燈何晝夜。非續上元春。花外無明種。光中不壞
身。三更般若地。一笑石頭人。塵夢年年憶。相看
面月真。

二月十二日重過蘊璞○斜景蕩陰翳餘寒生
寂寥曾同過月夜今復對花朝石上霜松立籬
根雪菜桃懶因成禁足送客到門逢

崑山顧錫疇過金剛寺○行行信偶失北時入朝
烟樓望九重闕窻橫千頃田禾糧閒具足緇素
藉相肩此夜燈邊影遽然落佛前○結夏禪林
迴無名可閉關湖光依北郭爽氣借西山日永
諸天靜鐘清初地閒新辭魔眷屬定入夜雲還

華亭汪曆賢同徐九一金剛寺看月○每不盡此
月、顧無吾兩人、去村光益靜、下雁影俱新。老樹
烏知曙、寒湖香在鄰。寺鐘遲未定、僧客共閒身。
昌平韓四維夏雨同文湛持諸公集金剛寺○禁
烟何處磬城西、晚入鐘聲穩故樓。世路日燒千
變化、空門雨色一端倪。似長夏、夢松如髮、漸易
秋、光草出泥。自是遠公堪作友、平橋家在綠楊
堤。○坐聽高言風易寒、月臺香盡破冰丸。君親

恩在空非界。師友心期戒。有壇樹入水。烟多晚。
合山圍城郭。自長安。林鴉宿鳥喧。難定不礙聲。
聞著野寺。

桃源印司奇金剛寺贈野竹。○北湖靜好未如山。
般若菴時却自閒。不道苾芻惟去髮。果空心事
任開關。茗香清福中無佛。應答圓機正是頑。客
慣沒游僧慣擾。四朝紳衿幾經刪。

英國公新園

夫長廊曲池。假山複閣。不得志于山水者所作也。杖屨彌勤。眼界則小矣。崇禎癸酉歲深冬。英國公乘冰牀。渡北湖。過銀錠橋之觀音庵。立地一望而大驚。急買庵地之半園之。構一亭一軒一臺耳。但坐一方方。望周畢其內一周。二面海子。一面湖也。一面古木古寺。新園亭也。園亭對者橋也。過橋人種種入我望中。與我分望。南海子而外。望雲氣五

色長周護者。萬歲山也。左之而綠雲者。園林也。東
而春夏烟綠。秋冬雲黃者。稻田也。北過烟樹。億
萬家。燦爛縷上而白雲橫。西接西山。層層鬱鬱。曉
青暮紫。近如可攀。

江夏黃正色。春日過銀錠橋。○遠水未成白。長條
復新黃。鱗鱗魚岸出。啁啁鳥林翔。寒去身猶似。
春將野可觴。客行冗似昨。又向一年芳。

三聖菴

德勝門東水田數百畝。沮溝滄川上。隄柳行行與
畦中秧稻分露同烟。春綠到夏。夏黃到秋。都人望
有時望。綠淺深爲春事。淺深望黃淺深又爲秋事。
淺深望際。聞歌有時。春插秧歌。聲疾以欲。夏桔槔
水歌。聲哀以嘯。秋合醺賽社之樂歌。聲譁以嘻。然
不有秋也。歲不輒聞也。有臺而亭之。以極望。以遲
所聞者。三聖菴。背水田菴焉。門前古木四。爲近水。

也。柯如青銅。亭臺菴之西。臺下畝。方廣如菴。豆
有棚。瓜有架。綠且黃也。外與稻楊同。侯臺上亭。曰
觀稻。觀不直稻也。畦隴之方。方。林木之行。行。梵宇
之。丁。丁。雉堞之凸。凸。皆觀之。

夷陵雷思需三聖菴同王德懋太史○南客徧宜
水北田亦插禾。雲光朝欲合。山色晚來多。羣鴨
蒲邊戲。有人林外歌。視聽殊未盡。無奈夜深何。
上清菴文瀛三聖菴○白月滿天霧露長。禾光樹

影、四、周、墻、風、吹、紅、雨、紛、花、片、不、辨、共、花、辨、得、香、

崇國寺

大隆善護國寺。都人呼崇國寺者。寺初名也。都人
好語訛語。名初名。寺始至元。皇慶修之。延佑修之。
至正又修之。元故有南北二崇國寺。此其北也。我
宣德己酉。賜名隆善。成化壬辰。加護國名。正德壬
申。勅西番大慶法王領占班丹。大覺法王着肖藏
上等。居此。寺則大作。中殿三。旁殿八。最後景命殿。
殿傍塔二。曰佛舍利塔。成化七年。勅碑二。正德七

年勅碑二、梵字碑二、梵字不知其工焉否也。濟濟歷歷然此必工矣。梵語乃不可識、矧可解以不識解生人齊邀天順二年碑二、西天大辣麻桑渴已非行實碑其一、大國師智光功行碑其一、元遺碑三、斷碑一至元十一年重修崇國寺碑其一、沙門雪礪汰積撰至正十四年皇帝勅諭碑其一、學中國字而手未忘乎筆波書弱碑、其排置甚難也。譯爲中國語而舌未伸于齒期期支支笑且讀之、皇

慶元年、崇教大師演公碑其一趙孟頫撰并書也。
斷碑者、斷爲七、環鐵束而立之。至正二十四年、隆
安選公傳戒碑、危素撰并書也。寺爲脫脫丞相故
宅、今千佛殿、傍立一老髯、幘頭朱衣、一老嫗、鳳冠
素裳者、脫脫夫婦也。後僧錄司司右統少師影堂
少師佐 成祖、爲靖難首勲、侑享 大廟。嘉靖九
年、以中允廖道南請、罷侑享、移祀大興隆寺。俄寺
災、移此、今一像一主、主題推忠報國協謀宣力文

臣特進榮祿大夫上柱國榮國公姚廣孝像精峭
滿月面目炯炯露頂袈裟趺坐有題侶署獨菴老
人自題獨菴少師號也少師釋名道衍字斯道吳
之相城里人葬房山縣東北四十里地名聖岡塔
成祖御製神道碑蓋少師生不冠而髡不受賜
第而寺處葬不墓而塔故享不脩廟而亦寺矣
附碑○長生天氣力裏大福蔭護助裏皇帝聖旨
軍官每根底軍人每根底管城子達魯花赤官人

每長成往來使臣每根底宣諭的聖旨成吉思恩皇
帝窩闊台皇帝薛禪皇帝完澤篤皇帝曲律皇帝
普顏篤皇帝格堅皇帝忽都篤皇帝亦降英功皇
帝聖旨裏和尚也里可溫先生每不揀甚麼差發
休當告天祈福祝壽者說來如今依在先聖旨體
例不揀甚麼差發休當告天祈福祝壽者麼道大
都裏有的南北兩崇國寺天壽寺香河隆安寺三
河延福寺順州龍雲寺遵化般若寺等寺院裏往

持佛日普明淨慧大師孤峰講主學吉祥衆和尚
每根底爲頭執把的聖旨與了也這的每寺院裏
房舍使臣休安下者鋪馬祇應休着者稅糧商稅
休納者但屬寺家的木土園林碾磨店鋪解曲庫
浴室人口頭疋不揀甚麼不揀是誰休倚氣力奪
要者這佛日普明淨慧大師孤峰講主學吉祥爲
頭和尚每依着有先老講主體解裏行老別了的
和尚每有呵遣赴出寺者更這學吉祥等和尚每

倚有聖旨度道無體例勾當休做者若做可他年
不拘那聖旨至正十四年七月十四日上都有時
分寫來○附少師偈○看破芭蕉挂杖子等閒敲
骨露風流有時搖動龜毛拂直得虛空笑點頭

公安袁宗道五日飲崇國寺僧房○老僧愛竹石
點綴似山家密絲通風遠流觴逕水還看魚栽
藕葉禁鹿蒿萱花一縷林烟散開黎供露芽

夏日黃平倩邀飲崇國寺葡萄林○數畝葡萄

林濃條青若若、以藤爲幃幃、以葉爲帷幕、以蔓
 爲寶網、以實爲瓔珞、蜩蟬遞代、翠雖貼勝俗樂、
 對泉坐良久、客衣增尚薄、同來四五朋、一笑破
 纒纒、依岼排繩床、禪玄入談話、魚葵帶露烹、摘
 茶揀水淪、石砌滴琤琤、劍鏑鳴霍霍、腴陳分兩
 曹、金瓜相擲擲、籠小罰已深、取鉢代杯杓、三伏
 此中消、萬卷束高閣、

桃源江盈科崇國寺○吏散人稀晷刻長、乘騎勝

一過僧房竹鑊芝本爲如意草像蘭芽號吉祥
番字寫碑成蚪結。泐幢飄影學龍翔。樂饒最是
清齋供。寬得旬朝中酒腸。

公安袁宏道二月十一日崇國寺踏月○寒色侵
精藍。光明見題額。踏月徧九衢。無此一方白。寺
僧盡掩扉。避月如避客。空塔寫虬枝。格老健如
石。霜吹透體寒。天街斷行跡。惜哉清冷光。長夜
照沙磧。

崇國寺同王章甫小修看月○涼月白霜階，光
膩平于砥。古木坐寒禽，寫影空牕裏。茶蘼藏古
雲，一葉寒吹起。角燈抽紫焰，凍花老甌水。滑波
映琉璃，一片冷光死。灰心半夜禪，寒鴉伴行履。
崇國寺葡萄園同黃平倩諸君劇飲○入門似
出門，莎畦布平遠。古根老巉石，涼陰厚深巖。茫
茫三夏雲，有舒而無卷。分棟理孫枝，鑿泉過小
巖。樹上酒提偏，波面流杯滿。荷花當觥籌，但還

花來緩、一呼百螺空、江河決平衍、流水成醕醢、
鬚鬢沾苔蘚、侍立盡醒顛、不辨慙與殘、翹首望
禪中、天地困沉沔、未覺七賢達、異乎三子撰、

再遊崇國寺○入寺稀人識、僧雛盡老成、花猶
香廢苑、石莫話前生、壁上苔棲墨、廊間雨壞楹、
春衣能幾日、又復過清明、○只作幽探計、如來
與證明、出門皆黛色、入寺有泉聲、酒似溪光嫩、
身如雲影輕、閉官無別侶、頭白舊方情、

吳縣王鏊姚少師像○下馬摩挲讀古碑，欲詢往事少人知。獨留滿月龕中像，共識凌烟閣上姿。頗隱三毛還可似，功高六出本無奇。金陵戰罷燕都定，仍是臙笏老稱師。

古墨齋

古墨齋在宛平縣署。萬曆初，河南內鄉李公蔭令宛平，發地得杜陵六，微有字跡，洗視之，唐李北海雲麾將軍碑也。字畫輕逸而正得老，如顏魯公體。至遲重而正得媚。觀此碑，悟古人筆法脫換與子瞻先後學二人書，以意參互處。碑存百八十餘字。碑首存唐故雲三字。公因築小室，砌碑壁間，曰古墨齋，傍置花柳以韻之。

肝膽李言恭雲麾將軍斷碑歌○蒼頡史籀不可
起蜎蜎鳥跡今已矣書苑千載尊鐘王乃有北
海接其軌秀勁首推雲麾碑當年洛筆風雨隨
何人擊斷成柱礎神物終爲造化私歲歲委置
荆榛裏瓦礫冰霜竟誰視數字模糊苔蘚封雙
螭斷缺斤斧毀吾黨好古有李侯忽焉搜致如
琳瑯一朝置向高齋壁拂拭光芒動斗牛李侯
邀我把酒看白日高堂氣自寒人生屈伸亦猶

此屈于不知伸知己

亳州朱宗吉雲麾將軍斷碑歌○有唐行押誰第
一北海書壇標赤幟當時一紙論千金况復流
傳久散逸娑羅岳麓俱稱奇神逸更數雲麾碑
一時絹素蛟龍走千載碑陰題題悲異物從來
人鬼怒亦有人鬼爲之主九淵尚獲隋侯珠雙
龍乍出豐城上四壁琴堂森古光呼相觀者如
堵麟新亭片牋勒文字絕勝沉埋道路傍此碑

遇合有時哉、一朝脫去千年背、李公摩挲李公
宗復何人斯置斯地

龍華寺

成化三年錫衣衛指揮僉事萬貴自創寺成疏請
寺額于朝。憲宗賜額曰龍華寺。卻覈報可。成化
八年沙門道深碑記焉。萬曆某年修撰朱之蕃碑
又記焉。寺小構像亦備威儀爾。其緣起奇。其所致
天下古德。又奇。萬曆之初中徧融大師自蜀達觀
大師自吳憨山大師自金陵月川大師自五臺雲
棲大師自武林錫先後止焉。寺之規必擇方外賢

者主方丈事。佛二六時之香燈。僧口中之粥飯。晨昏之鐘鼓。二時之課誦。皆修潔不間不爽也。寺門稻田千畝。南客秋思其鄉者。數來過聞稻香。

銅梁張佳胤宿龍華寺○塵未滿燕京。龍華境界清。三春風一枕。孤月梵千聲。花密時消雨。鐘疎夜夜更。抽簪如可得。白髮了平生。

東阿于慎行夏日同張洪陽懋龍華寺○同過湖上寺。伏日生清涼。水步交官闕。松聲和講堂。雨

歸遲葉靜風起稻花香小借支公榻于于午夢長

秋日龍華寺小坐○苑西橋北古祇林滿院松
槐晝鬱森山色平連三殿影湖光曲抱半城陰
垂垂望處先秋稍急急風中入暮砧冥坐不知
清晝永一函經過伴高吟

慈谿馮有經龍華寺○湖際先朝寺幽棲省物情
磬聲松下靜鳥語竹間清菰米羞香餌園葵薦

露葵重來知幾日、虛負老僧盟、

吉水劉應秋避暑龍華寺○無地堪逃暑、清齋試
掩扉、庭空雙鳥過、日落一僧歸、偶病藥爲茗、加
餐蔬正肥、浮名今老大、久矣歎塵機、○獨有幽
棲處、片雲方晝陰、青山擬病望、虛竹動秋吟、五
柳饒霜色、百桑遶澗心、我兼魚共鳥、誰別是浮
沉、

孟津王鐸龍華寺○乘露經蕭寺、年光馬上過、數

僧逃教見報國。戲詩歌志遠。嫌家果閑來。覺事
多人天俱分內。久此欲如何。

京山王應翼龍華寺○湖波遠遠濕朝暎。細寫秋
光上寺門。花木欲深香色聚。稻苗全覆綠雲屯。
壁殘瓢笠逃塵劫。殿古鐙幢屈世尊。物外老僧
邀客坐。將迎半日竟無言。

渭南南師仲龍華寺○國初風物寺初年。創置無
端聲聞天。仰見君臣真率意。遠來尊宿苦辛禪。

一湖浪白風生柳，千畝雲黃香過蓮。著我晨昏
鐘鼓內，經年客夢澹於烟。

應天釋飲義曉發德勝橋過龍華寺。雞鳴戒晨
色，宵林行未杲。城霧分嵐朝，花露墮渠澗。登登
德勝橋，已瞰龍華道。縈河間迅流，遠坂步香稻。
蘋繁叢幽深，孤蒲濯清漭。杖屨落桐花，襟裾動
芳草。西山親人眼，朝雲含將抱。觀物知遷化，鬱
鬱悲徒老。

桐城方拱乾過龍華寺○曠眼纔新到碧漪、
龍關互爭奇、水於北地品爲貴、春到南人夢易
知、僧語淡濃都是偶、柳情宛轉欲成絲、閒游頓
爾羈懷豁、久住寧忘再到期、

龍華寺前雨望○烟市萊青餘古寺、稻塍流水、
平荷花、送來雨脚層層過、望去峯頭的、斜短
磬忽驚依樹鳥、孤僧單住酒人家、桑麻久負南
中約、此夜懷新夢亦賒、

十刹海

京師梵宇莫十刹海若者。其供佛不以金像廣博。丹碧宇嶒嶒也。以課誦禮拜號稱。以鐘磬無遠聲。香燈無遠煙光。必肅必忱。警人見聞。發人佛心。其供僧不以精鑿致恭。竹木致幽。童侍致容也。以單無偃僧。院無喧衆。休恣不過伏臘。叅靜不過板粥飯。不過中。其潔除于龍華寺之前。方五十畝。室三十餘間。比如號舍。木屏磚牖。佛殿亦分一僧舍。不

更廣也。其初作者三藏師。師陝人也。幼事徧融大
 師。終身一衲。終身未嘗寢。多立少坐。危坐卽其休
 卧時。主十刹海二十年。終未飯。長任一顆。日出乞
 食。歸立鐘板側。其乞也。持珠佩一瓢。未飯仰之。既
 覆之。翁孺子見其瓢。仰曰。師未飯。爭飯之。不
 入人家。飯門外去。今一瓢一數珠。猶掛菴中也。紳
 衿敬問。師直笑語。如村師訓教材童。不少迴避。一
 宦者作禮問。師喟曰。女子夫朝貴人。念佛家中也。

得何得出見僧人。那畔無家法在者。畔無佛法在。將回檀施去。萬曆甲寅。師示寂。茶毘竟。一中貴言。苦行和尚。乃無舍利。忽爆一粒。著其掌上。神宗時。帑施日出。師定規。止晨粥午飯。典作白言。米麥幸多。方便爲十方念佛子。作朝時飯。師曰。米多不飽。米少不散。後神宗升遐。帑施不出。方僧他寺散畧盡。而此十方給仍前也。京師梵宇莫十刹海若者。

吳縣釋修懿十刹海○十刹海非刹、凝然古德風
 市居巖壑裏、門向水田東、耆宿推三藏、經賢事
 徧融乞、隨緣、假仰、立儼、嶽、衡、嵩、聽法、俱高、妙、說
 巾無侍童、直言等貴賤、醒語破愚蒙、僧不請恩
 齋佛寧藉像工、平平數椽屋、密密六明窗、哀憫
 西山寺、游觀額大雄、

千佛寺

孝定皇太后建千佛寺。千萬曆九年，毀供毘盧舍那佛座，繞千蓮，蓮生千佛，分面合依，金光千朶。時朝鮮國王貢到尊天二十四身，阿羅漢一十八身，詔供寺中。其像銅也，而光如漆，非漆也。尊天二十四像，穆肅慈猛相，具神足，衣冠法故，範鎔質良，所執持器，乘海脫失。蔡氏補之，非其國表也。厥工遜焉。阿羅漢一十八像，梵相，非東土形模，而與天人

示現威儀又別。而十八表異。非一意一手爲之。努
怒色。瞋卽定神。披卷若誦。聽物若審也。時西蜀
某和尚。以誣受訊。訊次。師稱華嚴佛號一聲。刑
具斷裂。飛擲屋端。訊者驚沮。誣乃得白。乃延請住
寺。法席大振。寺在德勝門北八步口。寺南一里有
小千佛寺焉。

固始余廷吉游千佛寺。○城北天開選佛場。松濤
聲合梵音長。千層瓣湧毘盧座。萬里函來舍利

光紫極有祥香出內黃昏無爽課隨堂蒲團一
息何年得普過僧房世慮忘

斬水官撫辰千佛寺○春鳥聲聲佛蓮華朵朵燈
膽聽惟畏愛久此卽高僧

火神廟

北城日中坊火德真君廟唐貞觀中址元至正六年修也我萬曆三十三年改增碧瓦重閣焉前殿曰隆恩後閣曰萬歲景靈閣左右輔聖弼靈等六殿殿後水亭望北湖建廟北而瀆湖焉以水濟而勝厭也先是皇極殿災乾清宮又災歲暮殿又災上命道錄司左玄義呂元節主祝事月給帑五十清醮也殿墀二碑一右春坊朱之蕃撰

一禮部侍郎翁正春撰天啟六年五月初六日巳刻北安門內侍忽聞粗細樂先後過者三衆驚而跡其聲自廟出開殿審視忽火如珠滾而上于空衆方仰矚西南震聲發矣望其光氣亂絲者海潮頭者五色者黑靈芝者起衝天王恭厭災也東自阜成門北至刑部街亘四里濶十三里宇圯地塌木石人禽自天雨而下屋以千數人以百數燄焚灰燼號聲滿滿死者皆裸有失手足頭目千里外

得之者。物或移故處而他置之。時崇文門火。神廟神亦燄燄欲起。勢若下殿出。祝跪而抱曰。外邊天旱。不可走動。神舉足還住而震發。

公安袁宗迫贈火神廟道士○事火道人事翻來水上居。鶴窺烹石處。魚呷洗月餘。世業五禽戲。家藏八疊書。南陵雖有命。藥酒自能除。

邢臺黃元功集李鍊師水竹軒○地靜烟雲滿。開軒水上樓。泥封丹竈濕。竹護藥苗齊。火德時爲

帝。冰心日有蹟。馮虛千古夢。能爲指階梯。

公安袁中道。火神廟小飲。看水。○作客尋春。易遊。
燕。遇水難。柳花濃。沒地。鷗。貌靜隨。鵲。歌舞幾成。
醉。塵沙不入。潤。石橋明。樹裏。誰信在長安。○不
敢望浮舟。聊欣澈靜流。鯨魚搖碧瓦。浴鷺蕩朱
樓。○卽以觀欄至。當爲待月留。明朝塵照影。數息
且悠遊。

英國公園

英國公賜第之堂、曲折東入、一高樓、南臨街、北臨
深樹、望去綠不已、有亭立榛樹中、海棠族而居、亭
北臨水、橋之、水從西南入、其取道柔、周別一亭而
止、亭傍二石、奇質、元內府國鎮也、上刻元年月、下
刻元璽、當賜第時、二石不與俱矣、亭北三榆、質又奇、
木性漸升也、誰搯令下、既下、斯流耳、誰掖復上、左
柯、右柯、各三四、遂相攫挐、捺捺、擻擻、

如蚪蚪文。如鐘鼎篆。人形况。意喻之。終無緒理。亭
後。竹之族也。蕃衍碩大。子母祖孫。觀榆屈詰之意。
用是亭亭條條。觀竹森寒。又觀花畦以詒物之盛
者。屢移人情也。畦則池。池則臺。臺則堂。堂傍則闌。
東則圃。臺之望。古柴市。今文廟也。堂之楸。朴老不
好奇矣。不損其古。閣之梧桐。又老矣。翠化而俱蒼。
直幹化而俱高。嚴東圃方方。疏畦也。其取道直。可
與。

亳州薛蕙英國公山亭宴集○東第君王賜西園
賓客來將軍元好士公子復憐人舞袖飛花旋
移尊影竹開坐須明月上不畏夕陽催

吳縣蔣山卿英國公山林宴集○甲第連雲起名
園對日開洞牽青薜荔石坐綠莓苔屢舞動花
氣和歌有鳥來主人能愛客數命鼓催杯

大隆福寺

大隆福寺、恭仁康定景皇帝立也、三世佛、三大士、處殿二層三層、左殿藏經、右殿轉輪、中經毘盧殿、至第五層、乃大法堂、白石臺欄、周圍殿堂、上下階陛、旋繞廳櫳、踐不藉地、曙不因天、蓋取用南內翔鳳等殿、石欄干也、殿中藻井、制本西來、八部天龍、一華藏界、具景泰四年寺成、皇帝擇日臨幸、已風駕除道、國子監監生楊洪疏言、不可事夷狄。

之鬼。禮部儀制司郎中章綸疏言不可臨非聖之
地。皇帝覽疏。卽日罷幸。勅都民觀。緇素集次。忽
一西番。回回。踰躍舞上殿。斧二僧。傷傍四人。執得
下。法司鞫所繇。曰。輪藏殿中。三四經頭像。眉稜鼻
梁。是我國人。嗟同類。苦辛。恨僧匠。譏誚。因讐殺之。
獄上。回回抵罪。攻西竺。轉輪藏。法人誦經。檀施。德
福滿一藏。爲轉一輪。一貧女。不能誦經。又不能施。
內愧自悲。因置一錢。輪上。輪爲轉轉不休。今寺衆

譁而推輪、輪轉呀呀、如鼓吹初作、

從化黎民表隆福寺○紺宇開馳道、天人此給孤、
宮剎裁寶勝、粉壁儼椒塗、有乳飛區別、無心感
苑植、石欄辭禁地、輪藏轉嵩呼、空自拜時竟、涼
生病者軀出門如墮切、車馬共塵途、

吳縣蔡羽九日隆福寺○尋秋隆福寺、丹碧擁黃
花、問並都門日、酒爲貧士家、鑒迴思往事、輪
轉和羣譁、橋口東西路、斜陽望翠華、

順天釋性柔過隆福寺○金碧先朝寺香鈿出內
家松杉留古籟欄檻落天花爽入西山影晴飛
北闕霞翠華行復駐望望暮雲遮

蒲井

出安定門外，循古壕而東五里，見古井，井面五尺，無收有幹，幹石三尺，井高于地，泉高于井，四時不落，百畝一潤，所謂溫泉也。泉名則勞，勞則不幽，不幽則不獨潔，而蒲井倚藤老蘇草深淵中，歲小亭，晝不見日，春初柳黃時，麥田以井故，靡靡且秀，游人泉而茗者，罍而歌者，村嬖而蹇者，道相屬，其初春首游也。

公安袁宏道遊蒲井○出東門于城古道三五折
破石蹶荒丘。云是故元碣。燒柳發柔條。卧桂吐
紅節。石溝注涓水。寒鑑寫空濛。燕女競遊騷。羅
襪帶香雪。梅花堆鬢髻。波影動文穎。青山酣遠
客。新鳥困啼舌。紅塵來頻頻。可消奔競熱。

再遊蒲井○惟我頻來太。無樽亦嘯歌。店荒酤
酒濁。僧近施茶多。竹裏分黃閣。波間語翠娥。溪
光最勝處。高柳蔭長坡。

莆田林老俞蒲井○寒泉凝碧甃一酌冷人心素
綆無妨短銀牀半欲沈畦渟魚藻入林影鳥巢
深偶值堤邊叟悠然似漢陰

順德黃儒炳遊蒲井○秋郊迢迢野雲陰隨地泉
源出古今側畔盤韋藤獨冒廻塘空碧水相侵
石牀煮茗閒中况花塢班荆郭外心暫豁公餘
塵半日風柯鳥語儼山林

江都鄭元勳蒲井○天氣蒼黃木氣微一痕村句

集朝暉、忽驚草樹亭依井、偶定風沙畫啓扉、雨
過也、流花片片、春深、有數蝶飛飛、葑田麥隴爭
相綠、綠似江南未若肥、